



天津交通銀行同  
人俱樂部圖書室

左文襄公書牘卷十八

起光緒三年丁丑正月訖六月

目錄

與張朗齋提軍

答劉克庵太僕

答劉蔭渠制軍

與劉克庵

答劉仲良中丞

與劉克庵

答劉毅齋

答金和甫將軍

書牘卷十八目錄

答譚文卿中丞

答劉克庵

答劉克庵

答張朗齋

答史繩之廉訪


與劉毅齋

答劉克庵

答劉克庵

與張朗齋

與金景亭提軍



答劉克庵

答劉克庵

與楊石泉中丞

答劉克庵

答張朗齋

與張朗齋

與羅孟威

答金和甫

與李小泉制軍

答劉克庵

書牘卷十八目錄

上總理各國事務衙門

與劉毅齋

答李伯質主政

答朱茗生理卿

答劉毅齋

與許筠庵學使

與張朗齋

答劉克庵

答譚文卿

與閩浙總督何小泉制軍

與胡雪巖

答周雲仙直刺

與張朗齋

與劉毅齋

答胡雪巖

與王若農

答劉克庵

答譚文卿中丞

答張朗齋

答曾沅浦宮保

書牘卷十八目錄

上總理各國事務衙門

上總理各國事務衙門

答張朗齋

與劉毅齋

與劉克庵

上總理各國事務衙門

與劉毅齋

與張朗齋提軍

丑丁

軍事以餉道爲要巴古之間時有伏賊伺劫致有梗阻則兩徐各存意見互相推諉所致見革徐萬福統帶以所屬兩營歸崑山并統又撥兩起馬隊兩旂步隊交崑山兵多於賊數倍若尙不能搜捕淨盡咎有攸歸矣承示穆家地溝鹽池兩處各紮一二整營則山北或可無事已遵照檄行大約穆家地溝本爲衝要而賊蹤併集則在噶順溝白山子徐崑山紮穆家地溝而以新派之馬步紮噶順溝白山子似較周密尊意擬紮鹽池扼其歸路尤爲妙著希卽照辦

答劉克庵太僕

書牘卷十八

周雲仙除前一日抵蘭小憩數日卽攬轡西行未免勞頓渠意不願作官卽不復強或卽畱之營務以近年諸事均須一手綜理多有疏漏而健忘日甚非得人助理不可且俟其來再商之李牧望洋本河州實任縱才難治劇亦不能不令其赴任方伯前曾以入地非宜爲言弟不以爲然河州雖積亂之區然人同此心但能廉靜處之亦可無事至恩守所言尤不足據昨於畱賈令一稟已深斥之初不料其糊塗至此也鞏昌顏守在刑部頗有聲望初履外任或於官場陋見未忘曾見到任後所上稟帖言隴西地荒人少意在縣令辦理不善已知其心中頗欠分曉甘南地方鞏郡尤形困敝以受禍獨酷子遺僅存急切斷難望其有起色鄭令署篆一

年謂其治理無效已屬不諒之詞若未覩其別項廢弛實蹟而卽謂其廢弛屬吏亦必不服聞該守此次到省帶有放債門丁向該縣索取過當之說或亦因此耶請告知峻峰方伯轉飭恩守以弟意告之如實帶有放債門丁卽准其支用養廉速將此丁逐去毋爲聲名之累如不肯聽弟當下訪札拏辦矣鐵紹裴聞於月杪赴肅所論涼郡各令才力均不稱意亦在弟意中惟平番宜撤永昌且摘頂再看餘均宜緩尊意以爲何如上臘巴古間山谷回騎伺間劫殺弟已發精騎前後兩旂馬隊於初六日前去又飭駐安西之捷中捷左兩旂步隊前去革徐萬福統領而以所部兩營并交徐占彪當可得力羅瑞秋一營請卽札調赴肅蓋易玉林已飭赴

書牘卷十八

二

安西填紮捷中左之缺此間須一營填易玉林之缺劉毅齋有信與譚心可言陝回來歸者百餘人安集延夷目亦有三人來投烏垣土回亦漸有來歸者均言帕夏已回喀什噶爾畱其子在達坂未知確否官軍患病漸愈但催巨餉耳

答劉蔭渠制軍

弟初入隴掄回充塞又有土匪潰勇叛兵交錯其間每起人數以十數萬數萬計亂離之後景象不似人世千里炊煙斷絕但聞狼嗥所部眾不滿萬分爲三路垂囊而入餓鄉朝不謀夕農部所貽均是畫餅東諸侯如楊石泉中丞尙惓惓有故人之意此外則秦人視越人耳兵事餉事如此而挈關隴周數萬里之地還之職方

誠平生意念所不到亦知我忌我者意念所不到也溟事雖艱鉅  
異常度尙不及隴十一得公從容治理自有成效可觀卽平時論  
之隴之地丁每歲僅廿七萬溟則除坐支外尙有廿餘萬以待部  
撥也隴之物產向惟瓜果糧料因不通舟楫無從銷售皮張亦粗  
笨不值價藥材無貴品只盼西路速定琛賚同來或有商賈問途  
於此否則無可生發不如溟之五金并產也楊雲階之外尙有調  
任永州鎮者亦願賦同袍田忠普又欲出關隨征弟皆謝絕之亦  
是無如何耳次兒孝寬性情尙厚然鈍拙殊甚以之了家事猶難  
放心更何能料量外事辱承青睞令其襄辦廣東捐局本應令其  
勉效奔走惟捐輸局務非孝寬所宜且廣東又協餉省分峴莊正  
爲弟籌解接濟拮据不遑若孝寬再赴廣東爲尊處籌捐峴莊更  
難相處且峴莊旣是華宗又曩時同事之人度無忽然膜視之理  
其不先隴後溟亦意中事正無須孝寬蝨其間去冬命孝寬改葬  
其母得其來信葬母畢當卽束裝度隴春仲可由湘啟程計亦不  
能赴粵有負寵命乞原宥之

與劉克庵

日前唐海籌差旋函寄葢桂計可達覽得省信知清恙尙未康復  
夜不成眠弟意衰年氣虛黃芪未宜多用葢其性主升提與喘促  
有礙耳人葢專補之品能益元氣服之必可見效上次所寄不多  
本擬見效後再爲續寄今乘范子湘之便復寄兩匣希卽試服又

高麗老山參三支形質迥異尋常或亦可用馮南斌昨送肉桂有言其可用者先揀一支并呈如試服有驗當續寄上藥中五味蛤蚧似亦相宜聞尊農已遣人請靜甯程牧來蘭診視想已到矣此信乞與一覽

答劉仲良中丞

隴餉自上年十月後又已斷絕不得已籌借華商款項聊資接濟幸臘月各省關諸君子垂念危局解款源源而來而尊處於協餉一項尤極意騰挪不遺餘力澹封域之災紓邊關之急兼籌併計不知幾費經營偉抱公忠感何能已瑪納斯南城克復收隊已屆大雪封山進取之期非俟春融不可蓄銳以動或可以速補遲謹

書牘卷十八

四

當殫力籌維勤求勝算以副蓋懷耳

與劉克庵

疊函奉問興居想已達覽尊恙本由氣虛芪朮原應服之品惟芪主升提朮補中焦於喘嗽不甚相宜頃見易策謙與柳葆元信知近服地黃略已見效足見芪朮不宜再投也大葠補氣而無升提橫中之弊正宜服之地黃究嫌凝滯不如阿膠惜少道地者弟前以洮水重降之品與阿井性同取熬黑驢皮當與阿膠同會屬洮營熬製嗣以治病頗能得力茲乘黃席珍差旋之便付上十一兩八錢八分請試服之此物能引氣下行又不凝滯較地黃自勝

答劉毅齋



大雪封山賊蹤闌寂貴部入山窮搜無得而巴古之間疊被伺劫  
運道中梗者廿餘日飭崑山調駐木壘馬步千餘人東旋搜剿開

正復派前後兩旂精騎

共二百五十騎

續派安西之捷中捷左步隊兩旂

共七百六十八人

由防地前往歸崑山統帶并革徐萬福統帶而以所部兩

營交崑山以資厚集分別防剿春令漸深雪消路出屆時馬步齊

集排搜而前當可埽除淨盡張朗齋信云此賊來路在山後鹽池

只要有一二營截住穆家地溝足遏奔衝渠當撥一營紮鹽池扼

其來路查賊分踞之地在穆家地溝之東噶順溝及白山子口兩

處而穆家地溝又通吐魯番大路雖無賊蹤亦當防守已飭崑山

駐軍穆家地溝而分馬步各營駐白山噶順溝爲暫遏竄蹤之計

書牘卷十八

如山內雪銷則馬步可以併進排搜否則雪深數尺馬可尋蹤步

難獨往也進兵南路必先將伏莽洗除然後一意馳驅運道無梗

春融時蜀軍嵩武各自防所排搜而前貴部之駐古濟西抵烏垣

者亦宜照前次深入窮搜務使蟣蝨搔除乃免牽掣之患幸畱意

爲要俄兵之在伊犁者本只一千

或云尙僅八百

陝甘諸逆及安夷不敢

輕犯其鋒來示綏來縣據商民稟稱余小虎近糾綏來迪化昌吉

各餘逆由冰嶺繞竄伊犁裹脅回民眾至數千有圍攻塔爾巴哈

臺之說俄人所設精河營卡已經撤去是否屬實想尊處續派馬

探回營當有確耗弟前擬暫置伊犁不問先攻南路意以俄人代

取代守爲詞姑以此委之將來南路肅清伊犁可不索而還也如

果賊由伊犁犯塔爾巴哈臺則我自不得不發兵勦之局勢又將一變俄旣不能拒賊我無坐視之理如果打敗逆回卽乘勝先收回伊犁將來更免藉口要挾此自在兵力之強人謀之善耳南路賊勢已輕蜀軍嵩武合之已廿餘營兵力尙不爲單穩慎進取得尺則尺後顧旣可無虞餉運常通以南路責其承辦似吐魯番伊拉里克尙無難料理如托克遜亦相繼而下則南路已有幾分否則嚴軍防守亦當能力扼奔衝也貴部先解塔爾巴哈臺之圍乘勝復伊犁再從伊犁踰冰嶺而南彼時托克遜諸城更將望風而解豈非幸中之幸哉綏來探報如不確則進規南路局面仍須照常惟二月之期宜改俟三月庶古巴運道清防營分布周妥古城

書牘卷十八

六

糧運速軍火可期應手前書所謂擔遲不擔錯也至所需軍餉弟自知源源接濟斷不使尊處爲難想閣下當能亮之尙冀善自珍衛爲 國宣威

答金和甫將軍

頃接毅齋臘廿四日來稟據綏來縣報陝逆余小虎有糾賊數千圍攻塔城之信惟尊函只先毅齋一日發遞并未語及豈傳聞之訛耶如確有其事尙祈商之毅齋速爲了此并須妥籌布置務使北路毫無罅隙方可專意南疆賊旣係繞伊犁赴塔城不審俄人畱守亦曾出擊否俄之畱伊犁兵丁究有若干近來意見如何或覓人偵之詳以見示上年撥歸錫子猷統帶之西征各馬隊已另

有調撥尊處所撥各營亦正需歸併汰遣是子猷應回本任以重職守馮以和少不更事羈畱綏來以致所部屯古城守候已有札嚴飭之尙祈催令速來

答譚文卿中丞

摺弁回營詢燕晉冬雪甚厚預卜豐穰秦中宿麥芄勃隴上均沛祥霏惟一冬和煖雪花入地卽化土潤而不透春澤及時乃可降種耳關外至烏垣則雪深數尺一如常年疾疫減退軍情甚奮毅齋所患全愈進規南路當俟暮春因巴古之間零匪伺掠須排搜而前雍除淨盡午道時通乃一意長驅無憂卻顧耳威酋去後洋務晏然聞南洋用二十餘萬收回鐵路又華商接開旗昌洋行去

書牘卷十八

七

頂項二百餘萬江浙與江西各認湊巨款以助華商意在收回利權與臺灣開礦同爲開源之計未審果能如願否也來示所云布國多方挾之說此間尙無所聞英國教士外又有日本游歷一事接總署信後已分別咨行妥爲照料無甚關礙亦無甚辦法惟煩囂不已足擾清眠耳臘間協款源源而來爲意想所不及極意樽節或可少延清歡惟洋款仍不能遲胡雪巖總無信來不知有無成說殊爲盼切無確實大款而懸軍深入非穩著也和甫信來諾以趕辦撤遣按實尙不能滿二十營能及早省悟不能求贏亦不至受累否則終無了局矣克庵同卿一病幾殆自元宵後服熟地始有轉機力勸其停葺朮服大瀉冀可康復如常成滌泉開缺

之摺甫發而病乃霍然亦非意想所及也

答劉克庵

得正月廿五日惠書欣知清恙痊可歡慰無似此次病狀似陰不  
藏陽所致其性升提附桂峻熱皆能加病不若薑之益氣補虛而  
不燥不滯爲相宜也所寄各品試取服之或可得效病後調攝以  
養心爲要養心非凝神靜氣不可寡思慮去煩擾其大略也案牘  
勞形暫宜分任幕府但總其成其有關係者仍決於弟可耳周雲  
仙精彩內斂條理秩如委其綜理營務可以代勞劉雲泉飭其到  
甘州本任當可有爲龍雲階可由尊處會委查甘南釐務陳紹斌  
信仍繳還董研樵當是爲門生故舊所累耳劉正高所帶馬隊可  
卽撤之蘇有慶所部勇丁多石成器弁黨不易馴服見在甚不安  
靜古浪頗以爲慮應卽撤換省垣抽一營尙易也王仁和所部亦  
難得力當徐圖撤換請存之匱中

答劉克庵

接二月初四日手書欣悉清恙就痊無任忻慝洸水與濟水性均  
湍急沈下所熬驢皮膏當與阿井同功如試服有驗自可多製承  
示夜間尙是半坐半睡與弟近時情形相同老年臥須高枕卽是  
此意患喘促者總苦肺氣壅滯全然偃臥則關竅不利也今晨堂  
期見客復發咯血舊患幸不過數日或是肺經寒鬱成火所致惟  
此外卻無火證也劉福堂一病不起十年榆關勞績中外又安官

吏士民均頌遺愛應請 恩卹以彰激勸文卿已委譚提戎仁芳  
接署當期勝任弟已加委數日內當由驛具奏若卽能邀 恩補  
實斯缺則幸甚耳存餉雖只有此數而鄂臺陝局收數尙復不少  
能數至五六月則妙陝西丁糧尙可就近挹注雪巖處久無信到  
此間相距太遠洋款是否借定無從得知大約不至無著惟遲速  
殊難預擬耳關內勇丁告假願領八成實銀者給實銀願領期票  
者給期票似可均聽其便并不加以抑勒情理兩得其平希酌度  
行之卓勝馬步全軍已到今日馬隊頭批啟行十五日二批繼之  
其步隊分三起繼進到古城後分營哨填紮直抵烏垣由肅按站  
行走非三月杪不達是毅齋進規南路當在孟夏矣馬隊點名畢  
計少三百餘名此逃逸實數也毅齋急於南下向索巨款卅萬請  
於存餉內速撥大批應之張署牧承燮虧欠公項數千均正款也  
難以曲免其人糊塗特甚無如之何

答張朗齋

師期春融開拔因巴古之間防軍互相推諉致運道時有梗阻不  
得不急圖搜捕而卓勝一軍又遲至於今始行抵肅州馬步分五  
起行走約此月下旬始克開拔齊進計到古城後陸續分布徑抵  
烏垣已在暮春屆時毅齋調齊各營分起南下當在首夏矣毅齋  
急思開拔而局勢如此不得不稍緩俟之非得已也賊勢雖甚衰  
弱然懸軍深入不可不倍加審慎能勁氣直達而又後顧無虞庶

免差錯高明必以爲然尊軍與崑山開拔之期自宜在毅齋之前  
仍請與毅齋商定爲要鹽池紮兩營截零賊歸路此信到時想有  
分曉崑山自正初前進尙未據報戰事大約或俟雪消路出乃搜  
山耶吐魯番就撫自無可疑小麥每石六兩高粱每石一兩價似  
不貴惟不知每石斤重究有若干成熟約在何時耳閱寄心可函  
擬由弟處派一營填紮舊城以內見此間無步營可撥當以欽標  
馬隊前來

兩旂共  
一營

### 答史繩之廉訪

得展惠書知初九日已接篆任事計眞除行知亦可奉到 帝心  
簡在民望攸隆煥發新猷弼成善教且欣且頌隴中吏事雖漸覺

### 書牘卷十八

十

改觀而飢馘玩泄積習已深非切實整理難期丕變所望風紀之  
司鼓舞振興乃有成效可睹滌泉廉訪久爲病魔所苦公事頗多  
積壓敦煌互訐一案臨解任時始具詳擬結意在調停置正案於  
不顧不知先請開復後又將案外牽涉各情別請參辦徒煩案牘  
果何所取鐵紹裴來肅暗問詢悉兩革令曾因狡執持刀拌命承  
審各員或因此慮激成別端遂擬顛頂了結并請均與開復以解  
其紛似此綱紀埽地三尺何存囂凌之風一開尙安問吏治仕風  
耶已批駁矣閣下在安肅任內曾承審此案一切情形本所熟知  
見正眞除無須再提人證卷宗即可定讞希與峻峰方伯秉公覆  
訊迅卽具詳以憑奏結如該革員等仍敢狡執抗不遵依或竟行

同無賴則稟請刊訊當先將大概具奏亦由其自取不能任其刁橫也承

審各員有宜更換者卽與更換首府似無分曉亦宜畱意

與劉毅齋

卓勝軍臘月於包頭開行因皖餉積欠未清沿途截餉接濟中衛涼甘等處節節耽延馬步長征多就疲乏延至二月初旬始行到

肅十三日頭起馬隊由肅前進間日一起馬步分五起行走至二月廿一

日始可過完金景亭於是日親帶第五起前行察看此軍尙整齊踊躍助換精利

槍械當能得力惟安西哈密巴里坤等處須令小憩比到古城齊隊景亭應卽輕騎赴烏垣稟商麾下布置古城迤西至烏垣一帶馬步分屯而重兵駐於烏垣以重形勢籌布定妥務計萬全而後

書牘卷十八

十一

大兵一意長驅乃免後顧牽掣通計時日非孟夏之初不能就緒

前函言師期宜定暮春尙嫌迫促然亦無法速之愚意孟夏出師

距收穫之期不遠天氣和暖軍行爲宜嵩武蜀軍同時并進蜀軍於卓

勝過古城卽進嵩武於卓勝過巴里坤卽進尊處可照此下文書麾下浩蕩長征聲威所加拉朽

摧枯自然如意回疆正以安夷征調爲苦嚴戒搔擾就地採糧給

軍其勢易振但能速戰則緩進未嘗非策也餉事自上年十月後

卽乏來源所藉以支持者各省關解年終一月滿餉尙爲踊躍而

陝鄂滬各臺局新借華商巨款得資周轉三月以後又無可措手

滿擬上海借洋款有成當資敷衍而昨接鄂信稱借款爲和甫催

餉委員許道厚如攪壞又俄英兵事方興事多夾雜恐其難成擬

仍奏催各省關提前趕解未知究竟何如尊處前敵要需斷無不  
速籌接濟之理惟各營各局林立遇有餉到不能不均勻撥給以  
期公普而速事機其間亦有因零騎竄擾耽延積壓不能迫促者  
想已在意度之中見正極力籌措大批起解備大軍踰嶺辦糧之  
需路遠餉艱諸以樽節爲要潘長清等見募一營紮大營近處克  
庵信來譚慎典一營由剛毅軍內抽撥足數開行約三月初惟張  
俊招募尙未竣成軍稟報其人明幹當不遲緩閣下原令三月赴  
南路會師弟飭潘李先稟知尊處問明進止到哈密後自可得准  
信耳金和甫旣調伊犁古城迤西之殘賸馬步各營自宜調往歸  
併弟之飭金景亭將所部分紮而歸尊處節制調遣正爲此也錫

書牘卷十八

三

子猷來肅已數日

其人固難於位置

將經手款項說明當可過返烏垣以

賊勢言之帕夏暫返阿克蘇或是回顧之說畏俄人之襲其後耳  
白彥虎將余小虎縛送帕夏或是圖併其黨夥綏來所探商民之  
詞旣屬謠傳俄人近并無人來說交還伊犁之事似意在索兵費則我之

急規南八城緩置伊犁乃一定之局緩圖伊犁於事更穩惟白逆

必須防其狡脫陝甘各回聞所存無多若果誠心就撫或宜網開

一面然若輩除白余死黨外多係曾經受撫者一經兩逆招致卽

從亂如歸以致重煩兵力則聚殲之亦固其所師進南路運道必

改由哈密西行乃臻捷便朗齋知顧大局運事當可藉其臂助卓

勝進古城迤西尊處派紮防運各營應緩緩撤動以資熟手其烏



垣亦宜畱防臺之營想高明自己籌及英西林有信來大約三月內可到肅州

### 答劉克庵

譚慎典營勇多由剛毅軍挑派自屬可靠業已啟行當可到肅張俊所募甘勇未知何如軍興既久流弊滋多哥老之害近時尤其昨得都中信少荃所部淮軍駐天津者竟戕傷營哨各官叛去七營沿途裹脅不少天津塵市大受其害大名總兵收撫未成已向山東潰走恐其患仍在江南也聞此變亦係哥老所致淮人本是捻餘又加入此匪恐難速了前年曾致書沈幼丹屬其嚴防勿專倚淮軍蓋因劉峴莊嘗有此說不獨楚軍餘風未殄也無如耳食之徒總

### 書牘卷十八

三

以淮軍爲可用楚軍多哥匪爲言復驕怯成性不知自省奈何蕭得龍應暫不准假不但替人爲難且狄道換官之際亦不宜易將也如蕭不能畱兄意擬以周雲仙代統其軍惟思該軍另是一路之人與雲仙不相習驟易主將恐不相安似不若調該軍赴省訓練整齊以雲仙統之而調元尊率所部三營填紮蕭得龍遺防爲妥未知尊意以爲何如元尊長於軍務於世故本非所諳外間頗有藉以通氣妄加猜議者若雲仙處此則省卻多少閒話亦所以愛之也此事尙未與雲仙說及俟得復信後再與商之署中存銀五十餘萬已有瓶罄之患洋餉尙無定局慮不足靠日內當具摺詳陳委龍雲階查甘南釐務札應由弟處徑下已遵照發札并咨

達冰案雲階到省時希派辦釐務熟手隨其同行爲要巴古兩局  
開辦尚順每月約可五六千兩將來哈密亦不能不辦但須俟吐  
魯番了畢棉花茶葉能行銷無滯乃可著手卓勝分五起行走俟  
過巴里坤嵩武軍卽陸續開行過古城畢徐提督陸續開行由古  
城至烏垣分紮畢毅齋整旆南下大約總非四旬內外不能辦到  
今日已分行遵照矣毅齋此行全恃餉足始免停待之虞洋款無  
成則華商之借不可緩似雪巖尙能任之西征以來爲此焦煩不  
已蓋以甘肅實無從籌措耳命實爲之復何言哉

答劉克庵

承示板石坳佳壤已將亡室及二小女改葬前得四小兒來信已

書牘卷十八

西

奉告矣前數日得二小兒回省後來信并言老兄所相道林橋一  
穴嶽麓一穴價均不昂擬卽畱爲壽藏他年歸蛻於此嶽麓脈自  
龍山分出蜿蜒千餘里較嶽雖博厚不如而盤折雄秀實有獨勝  
之處南軒與朱子於此山游覽殆徧非無因也已飭小兒輩請源  
圃兄於嶽麓定穴作生基死便埋我湘山湘水樂哉斯邱來示云  
云二小兒已經稟達所以爲弟計者至爲深遠感荷何言他日魂  
魄有依地下猶拜故人之賜也大淺四支斷不必還請卽畱用弟  
處尙有積年所存者益猶大兒病殆時所買及各至好所贈比擬  
送回湘中而已得凶耗遂存篋中弟性不喜服藥久畱亦屬無用  
兄正需服此故以移贈非尋常套話請卽以配藥爲要洮膠必可

合用文冬後當多多製辦

與張朗齋

卓勝全軍臘間由草地拔行士馬尙未形疲乏景亭禁令素嚴匙  
有犯者出關以後居民安堵已有頌聲甚爲幸慰惟皖餉不濟弟  
處墊發太多難乎爲繼無若之何晉本認半餉近閱華潭中丞鈔  
寄摺稿則并半餉而亦不認將來此軍之餉大爲可慮麾下與蜀  
軍師期以地之遠近爲先後昨由公牘咨行計達偉照惟頃閱毅  
齋與譚心可書渠因節交夏令炎熱特甚而機有可乘失之可惜  
擬於花朝進兵未知有函約商尊處否湘軍旣擬先進則麾下與  
蜀軍不得過遲乞與崑山商之兵事本難遙制然不俟卓勝到齊

書牘卷十八

五

卽先進南路終非穩著也計此時渠已開拔不便中止祇可聽之  
已告知崑山卓勝過巴里坤卽可進兵也承示吐魯番就近採糧  
一節查閱單開種植收穫及斤斗輕重極爲明晰就地採糧可省  
運脚況以斤重核其價值極爲便宜自應及早定議收採以供軍  
食請尊處卽委妥員前往辦理糧料弟處委員解銀則并計約需  
見銀若干弟當力爲籌措也崑山如託代謀採運亦可分給此公  
不善經理恐價值高低不一反礙局  
面岳遊擊聞只募得二百餘人本擬飭其赴狄道募足一營又念  
王提督岳遊擊於狄道人地俱生不能應手麾下旣以石補天爲  
可或卽令其赴狄募足三百赴軍前補額何如此等補額勇丁到  
營後每插隊伍不患其自爲風氣也豫省畫甘餉五千作運費當

不致爽約以近時人情推之類皆然耳劉鳳清既定議進紮自難令其分心屯田所請耕種諸需已飭停給

### 與金景亭提軍

別後得玉門張令稟知雄師次第出塞居民安堵如常具仰禁令森嚴載欣載頌惟張令稟中有云麾下抵玉忽患鼻衄勉強就道深爲懸念此證多由受熱而生南人偶臥熱炕亦易患此世傳有驗方用荆芥穗炭一兩黑薑炭八分共研極細末以喫鼻煙法當鼻煙常喫之可治此容易製辦可卽試之月前慮師期不宜再緩告知卽齋軍門俟貴軍過巴里坤卽率所部嵩武全軍西進告知徐崑山提軍俟貴軍過古城卽率所部蜀軍踰山南進毅齋京卿

### 書牘卷十八

夫

則俟麾下抵烏垣商酌後再行南下已由公牘咨行計早達台覽頃閱毅齋致譚心可兄書係二月初四日所發意以尊軍遠道奔馳未能速赴春融之約而南路天氣炎熱甚早麥秋收割每在春夏之交以機有可乘時不可失多候一日卽多耗一日之糧銳意於花朝前後一鼓而南是此時早已前進麾下抵古城卽毋庸赴烏垣會商以免空勞往返卽將所部酌派分紮由古城至烏垣運道嚴密探防以重後路毅齋駐營各要隘前已由公牘鈔行卽請查照分紮爲要皖餉尙無報解之期晉餉尙有奏停之議焦灼何言鞍馬勞苦尙祈順時珍攝

### 答劉克庵

承錄寄戶部二月十日公文知已行各省關提前三百萬起解限三箇月歸數餘均定八成以上是餉數又免虛懸弟於初五口下午接得此件而催餉摺稿已將繕就不能不發次日辰刻遂卽拜摺限行五百里馳遞雖較戶部增提百萬而實則劃還華商百萬本息所餘尙難敷衍施均甫接滬局友人來信似洋款尙不致落空以雪巖平日辦事之法言之必有以報命也時局如此不能急切求之只可委蛇以期實濟儻洋款商借有成則十年劃還本息歸款各省關亦不虞迫促而本年只餘三季略資支展矣且請寬懷浙案已定石泉失入之咎自不能免惟揣度當軸用心方倚其協解海塞防勦餉需則必不令其脫手無論降革總是畱任處分

書牘卷十八

七

耳數日後當仍發三路進兵之摺便中附請各省八成以上藩司議敘以協人情毅齋進兵尙未稟報的實日期而前數日心可接其來信有定擬花朝前後之說卓勝到古城總在一月之後想尙無妨昨到十五萬兩已轉運十萬赴古給領再俟續解廿萬到仍當分解以塞其請行師絕域財用不可不豐自應多爲儲備免其臨渴掘井致誤事機張朗齋處須預發糧價以便採運徐崑山處已加解一月滿餉飭令速進安哈巴古轉運經費正在紛紛求發亦須巨數點綴看來夏季仍不免饑荒也成滌泉悻悻而去於情理均說不去臨行忽將敦煌案草率具詳只願脫手不知 國家何負於伊徐李氏慘殺婢女弟屢函致峻峰屬其轉商核實懲辦

昨閱史廉訪稟據賈令呈出兩詳亦由滌泉授意減換是其用心  
竟不可測至此夫復何言李正魯南字兩營是否已調省汰撤若  
得精實一營填紮而飭周玉堂勻撥聯接自期周妥乞畱意焉至  
各防營應兼收本地土勇原因預備改爲制兵起見如內有精壯  
土人正宜收用訓練以期得力惟雜收充數者則宜汰換非不取  
土人概用客軍爲是也高明當以爲然譚慎典所募乃八百人李  
潘等所募亦六百人已於初四日  
拔行出關未知張俊所募甘勇又有若干  
來已溢於毅齋原定之數矣譚心可已假歸省親周雲仙去畱應  
候尊示近年弟處營務均由弟裁決未常假手他人雖明知食少  
事繁前人之言實宜取鑒而一經諸公參預便覺頭緒紛紜反費

書牘卷十八

五

尋討故但請謹司冊籍及點驗兵勇而機務不預焉衰朽餘生自  
尋煩惱實亦非得已而不得已也今日得劉蘭洲書擬於今夏服闋  
後入都便道西來似有戀戀故人之意或俟其來商之嗜血不過  
偶爾見尙未發只是腰腳脹痛步履須人扶掖耳

答劉克庵

三月二日書到知尊恙已康復興居如常至以爲慰淮軍叛走入  
山東後尙無所聞或已隨便了息此風一開效尤必眾將領事權  
盡移廝卒之手事不可爲日斯巴尼亞狃於各國囂凌之習亦思  
以詐力脅我閩浙皆設防待之撫軍調兵輪十餘步營廿餘赴臺  
沈制軍飭浙准備得黃芍巖信似水陸可保無虞如臺郡兵力足

恃南洋能制其不能停泊登岸則此虜仍當敗興而歸胡雪巖借  
用洋款尙無的耗以愚意揣之似必不致落空初五日五百里摺  
稿計達冰案措詞尙活縱洋款無成亦不至茫然自關隴移節以  
來習見已慣如有一年見成款項專一用兵則可免焦煩矣此豈  
可得之數哉陝借四十萬文卿必有以應之然亦在新餉有著需  
用甚緊之際此時尙緩亦可緩也南字營撤遣之費應需若干調  
整營換防最爲有益王仁和到肅意在久畱卻未形諸口弟亦含  
糊置之聞其軍欠數非多次第縮併尙易著手但非見餉足敷不  
必急耳錫領隊久畱此間無帳可算并除虛耗外尙有欠項求爲  
代還可歎可惱亦姑聽之元尊俟外城工畢再赴狄替蕭得龍亦

書牘卷十八

五

不必急雲仙此月杪當由肅啟行已檄調劉蘭洲赴隴大約季夏  
可到渠原擬服闕後四月入都繞道西來也王萼農急於來肅意  
在獎敘之速不知此間無可位置還是在蘭辦事爲有益於弟仕  
宦而求速化古人所戒況軍功尙屬他途乎幸以此意曉之毅齋  
保案尙未見到大約臘間半途遺失已專札催取矣敦煌互訐徐  
李氏慘斃婢女兩案關係匪輕承審各官竟敢任意行私紀綱何  
在弟意決不爲若輩牽鼻已於史臬司稟批示矣首府諸欠分曉  
殊不放心

與楊石泉中丞

閩邸鈔藉悉餘杭一案結局竟出意料之外閣下塵視軒冕知不

以得失芥諸懷恭讀 諭旨平反本案外無詰責之詞閣下惟當  
引咎自責而已惟徧查洗冤錄凡毒斃無以骨色辨驗者似此次  
件作檢報問官定讞或別有所本而刑部原奏未見鈔發將來纂  
入則例無所依據正恐疑竇滋多耳閣下以微譴還山適符遂初  
夙願令人惜亦令人羨前撰聯句勉爲蒼生畱十稔不意竟成讖  
語東坡詩有田不歸如江水仕宦中人亦須稍畱退步公素以求  
田問舍爲恥弟所深知上年曾承高誼割廉泉萬兩備弟犒軍之  
需鄂臺旋報於上臘轉解弟承厚愛敢不拜嘉惟軍中用度有礙  
報銷者向均取廉餘津貼不待外求閣下處膏腴不以自潤而乃  
惠及邊軍鄙懷竊有難安之隱茲值還山有期已屬若農預爲籌  
及俟台從過鄂仍以奉還伏乞鑒入西事於暮春之初三道并進  
又克吐魯番從此下兵八城局勢稍穩何當公家事了早日乞身  
與公徜徉故山一娛暮景乎

答劉克庵

餉事部樞正肯著緊不便屢瀆且俟前摺 批回再酌兩江江蘇  
此次部議并未列入提前項下或畱以有待也陝庫意以甘餘萬  
挪濟只可聽之母須催促此時仍宜撙節支用計延至五月後或  
又有柳暗花明之望胡雪巖迄無信至大約前途尙無的耗以其  
平時辦事之法言之或不荒唐也石泉去浙浙人亦頗有去思

朱若

生理卿信

中提及 廷旨雖巖然公論自在當仍起用暫時抽簪歸去瀟



灑數月一息塵機未嘗不佳請賦同征當於秋冬間補牘上年承其雅意寄廉餘萬金爲弟犒軍之用比欲奉還因其起病未果茲旣還山應由鄂臺撥項歸趙俾供饋粥之資已函告若農矣浙餉有衛靜瀾方伯主持其人古道能識大體弟所素知或仍照常起解梅小巖暫不作梗亦意中事惟後此則不堪覆按耳元尊城工尙未蕺事不妨緩赴狄道雲仙當於四月前來蘭州官場風氣專講貨緣打點喜造謠言雲仙明白沈靜當可挽回一二也劉正高馬隊設立已久不圖浮冒之數乃至於此請卽遣撤王仁和所部惟馬隊稍好擬調其來肅羅瑞秋調赴哈密填朗齋原駐之舊城以軍裝局存儲舊城之外備前敵各軍取用者甚多不可無人照

書牘卷十八

三

護也羅瑞秋之營頗散漫無條理因奉檄出關始求換洋槍四十杆矛杆八十有奇取視皆不能用之物不知其何以不早爲求換甘心廢弛一至於此嚴加斥責但磕頭而已無可置辨也此外再發精騎右旗同去陳宗蕃人尙明白當能爲其臂助譚慎典募帶楚勇多至八百意在不歸張俊管帶毅齋當初遣令同張俊募帶甘勇本欠分曉見在尙未開行張俊新招尙未取齊到肅不知何時而用費甚多殊爲煩惱毅齋性本揮霍近自信用周漢更益侈泰竊爲慮之周漢丁承重憂毅齋請奏畱營已批駁不准矣毅與張徐書定三月初進兵先打達坂其稟牘亦稱三月朔日張朗齋已先期紮鹽池徐占彪於初八日會張部孫提督鹽池馬隊進

襲七克騰木初九日進關展克之卽駐其壘朗齋親率大隊赴關  
展以規吐魯番去關展百四十里想捷報當在旬日後吐魯番本地纏回  
早欲就撫安集延踞賊不甚多當可早了毅齋攻克達坂始能會  
合大約捷報當在途耳毅與徐均索餉甚急惟朗齋不然金景亭  
卓勝全軍此時計抵古城惟新募之五百人尙未見到涼甘各處  
亦無過境之報不知逗畱何處

答張朗齋

疊接函牘敬悉師行次第及克復各城詳細情形欣慰之至麾下  
成算先操指揮若定膚公迅奏迴越尋常每次書到傳示同人莫  
不眉飛色舞見將大概情形先行入告想已喜動天顏容再報

書牘卷十八

三

詳細戰狀附請優敘孫提軍自當首屈一指其出力各將士必當  
優擬以酬其庸吐魯番本車師後王庭得此則南疆全局已在掌  
握矣此處土地肥潤天氣早暖產糧爲多如能約束各軍俾無擾  
累則糧運均可就近辦理不但可省勞費且捷便無逾此者安集  
延虐使其眾官軍撫之以仁安集延貪取於民官軍矯之以寬大  
回部方出虎口而投慈母之懷風聲一樹則取南疆八城易於反  
手尙何敢久抗顏行自取屠戮哉見在應及早籌辦者設驛站以  
速文報分立糧料柴草各局以便轉運資纏回人畜之力而給以  
雇值均其勞逸令其樂於趨事無所畏忌則回民胥勸不煩鞭箠  
而事易集其心懷兩端喜亂而不可化誨者則不與曲貸以昭炯

戒花門亦具人心豈豚魚之不若乎見委雷道赴吐魯番籌辦撫輯採運善後事宜其人才識平平惟盼隨時指示俾有稟承庶免貽誤已面屬其遇事稟命而行矣尊處所委辦糧之潘令聞其爲人樸謹持廉已遵照加給委札并選派龍令魁前來會辦其人明白與潘令同縣素好當可相安幸詳察之再毅齋見圍達坂聞賊改築新城於兩山間極爲堅固毅齋意在聚而殲旃俾夷回有所震懾庶南八城易於措手惟攻堅無善策除開花大礮外惟掘地道轟攻一著然遇劇賊誓死固守則兩策亦復難於見功且精銳多傷軍氣或因而不振頻年見聞所及蓋亦不少毅齋精於用兵此次不欲避難就易尤見其忠勇惟鄙懷不能釋然頃接羅孟威

書牘卷十八

三

與譚心可書略悉其進攻布置大概所言古局運解維艱烏垣存糧無幾而所部隊驟日久疲乏深慮輓運不供弟慮其因軍食不充或迫促從事致多損折又慮屢攻未下致軍情忿激墮賊計中展轉圖維愈爲焦灼孟威會克吐魯番後未知仍返達坂城否一切如何計議并無隻字見告查吐魯番收穫最早者惟青稞冬麥兩種節交四月青稞可收不知見在何如陳糧是否可採若干附近達坂諸處是否尙可採買無從查悉愚見糧無陳新或尙易設法惟運腳無出最是可慮不知高明能否一紓籌策吐魯番車輛是否可以廣雇貴部車駝是否可以借用希卽示知見飭龍令攜銀二萬兩前來伏祈指示一切俾有遵循龍令初出任事深恐計

慮難周雖由弟札委前來仍與尊處委員一例幸勿見外弟已屬其恪遵訓誨矣

與張朗齋

尊軍開拔西進所畱駐紮哈密之馬隊自應調併前進弟見派羅

提督瑞秋步隊一營陳鎮宗蕃精騎馬隊一起凡稱一起者均是半營同駐

舊城以資照料哈密重地不可太空且前敵軍裝軍火均屯哈密

不可無營照料見飭彭丞昌煥於此設立釐局將來茶自內出棉

花自外來當有釐可徵耳尊軍畱駐哈密之馬隊應否分布哈吐

之間作爲馬撥俟塘驛立定再撤併前敵一俟尊裁瞭墩通車由

此抵吐魯番本係車路通行之地惟年久失修恐馳驅不易請麾

書牘卷十八

酉

下通盤開除平治以利轉輸所有應設糧料柴草伙店均請察酌

安設并修濬泉眼開通水渠已飭張倬季方卸哈密署任委程敏達接署

專辦哈密西至吐魯番一帶塘驛并經理局店各務所有工作事

宜應否卽用本地回民照給雇價免致勇夫雜處易起衅端張倬

季方獨辦此事恐忙迫不開請委聶副將幫同辦理此事正用得

伊著也糧駝於春乏之際未可兼程民駝又不能湊集二千雖趕

飭哈局續撥車馱仍慮無以應之吐魯番旣復自可雇用回民車

輛站站安設給以雇價馬牛均聽其便銀錢搭放可也十三日克

復吐魯番兩城捷稿弟已將大概情形入告至斬擒若干及奪獲

若干均須俟下次詳陳上年古牧地烏迪二城克復卽是先報大

概後陳詳細情形并請從優獎敘一一均邀 俞允有例可援也  
閱致施均甫書有進規八城雄略不欲畱守吐魯番自當照辦以  
副偉抱見所籌布署一切卽因仰體尊意而起惟地方初復無駕  
輕就熟之選共紓籌策雷道才具只能如此見遴數員助之或加  
以歷練將來有成則幸甚矣麾下建大將旗鼓而西擬畱徐崑山  
孫少襄守吐魯番以爲後勁尊意當以爲然也達坂城如能速下  
雄旆自可會師進剿如達坂城開而托克遜機有可乘或先由麾  
下率師會同孟威進取亦無不可惟究不如達坂克定氣勢更爲  
雄闊旣穩慎又省力也吐魯番旣克善後諸務紛繁辦理周妥可  
圖數百年之安否則不知何如目前急務無過乎此不比各處

書牘卷十八

五

尙易料理也羅孟威處另有信去此函亦可與其共看達坂戰狀  
何如請隨時馳示

與羅孟威

張徐會報均稱尊處十三日會師攻克吐魯番一日夜行二百餘  
里士氣百倍是閣下自十一二日由達坂分師赴約可知弟已將  
會克大概情形先行馳奏擬俟達坂蕝事後再將詳細縷陳懇

恩優獎數日內盼達坂捷音未到卽尊處會克吐魯番之稟亦未  
見到未審達坂戰事云何以局勢論官軍持滿而發攻此斗大之  
城縱賊眾且悍亦斷無他慮惟攻守之勢旣殊長圍早合賊處必  
死之地其困鬪自在意中雖只零星小醜亦未可輕視毅齋英銳

用軍最精自知相機而動而攻堅除開花大礮及地道兩著外別無長策萬一窮寇負隅堅固不出兩策并用而缺口終難搶入折損必多數次如斯則銳氣銷磨恐難復用此僕之所反復籌維不能釋然者也書中所述烏垣存糧不多隊驟車輛均多疲壞尤極懸系見派龍令魁攜銀二萬兩赴吐魯番採買糧料函託朗齋軍門就地代辦詳明指示計可稍紓籌策以濟飢軍又譚慎典已集南勇八百餘名到肅點驗隊驟百數十亦尙壯健已飭於四月初三日西進并委馮遊擊立春到哈後取大田雜礮并子解吐魯番以備總統調用放礮之人則於知放開花礮中求之其精利較車輪大礮尤勝也

泰西所謂天礮卽此以其從空墜下故

龍令馮遊擊譚提督均須此

書牘卷十八

美

月底五月初可到計屆時吐魯番青稞已可收穫冬麥亦可望收糧事當無憂不濟其陳糧可採者卽就近廣採於委員未到以前多爲採運則尤妙甚朗齋治事有條理深以顧大局爲意必能助一切也吐魯番距達坂城二百餘里向係通車大道自以車輛運送爲宜彼地畜馬牛而無驟隻可廣雇馬牛大約六日可一往返護運之軍有貴部及譚慎典所部儘可够用也

答金和甫

營事經此次歸併整理壁壘一新定可仰副蓋抱切在同袍曷勝幸慰毅齋於三月朔日進軍出賊不意將達坂堅巢鎖圍密合悉力攻堅計有數次惡戰惟攻堅不易將士冒險鏖鬪損折必多而

裹糧無多後路轉運不暢殊爲懸懸尊意以劉提督駐烏垣固後路極仰公忠之誼佩慰何言金提督運昌報於十三日過哈密其前隊想已行抵古城計三月杪可以布置周安卓勝一支近尙整飭甯能與劉提戎共濟也一切尙祈就近指示機宜張朗齋徐崑山馳報已於三月十三日會同湘軍營務羅道長祐攻克吐魯番滿漢兩城機局甚順俟達坂克復乃可節節進取昨接俄官來函譯出一通咨達冰案此次來文尙講情理所稱劫殺各節諒無虛捏自應澈究以服其心榮侯所部如實有其事亦不妨據實登答以便酌量處置萬不可稍從諱飾致彼族有所藉口翻多枝節弟頻年與泰西各國交涉總是不說謊不講辦法專以情理與其辨論究亦可省多少事端俄官既有函到敝處自有函牘徑抵尊處應如何辦理之法想蓋籌早有定見乞詳爲示知此事不速了結伊必向總署饒舌終不能閉目不理也高明當以爲然

與李小泉制軍

前展惠函如親警欵就稔吉座重升新猷日暘至慰頌私春融師進南路三路同規尙爲順利惟糧臺以次添設處處須發巨款存以濟用庶免阻滯由吐魯番西節節攻擣至阿克蘇始與道光初年攻拔南路西四城之局合縱令拉朽摧枯而路途迢遞四千里餉饋何以能支衰朽餘年未免日暮途長之感耳尙冀公忠偉抱進而教之幸甚幸甚鄂湘青黃不接之時穀價昂貴聞湘中尤甚

未知入夏以後復又何如齊晉中州頗憂亢旱豫民過秦就食者紛紛已飭平糶給賑能資遣還鄉播種秋稼則猶幸事耳若農匏繫多年實由弟牽帥所致遇可設法之處乞賜援手感同身受仍希鑒存

### 答劉克庵

劉正高馬隊減去二萬有零樽節甚多足昭核實南字兩旂併作一營煙徒既淨壁壘一新城工速竣可爲數十百年之利元尊駐沙泥寨更爲妥便鄧榮佳三營旂駐狄道儘敷鎮壓狄道固則河州更爲得勢河西營賊在瑪納斯就戮根株既淨撫綏就撫良回又得其情自無他慮前此馬占鼇馬悟真馬永瑞三人各遣子弟

### 書牘卷十八

五

來肅問安溫諭遣歸察其情色更覺依戀不盡馬占鼇令和番撒平其爭訟當已踴躍前去矣蕭得龍所部能挑畱若干卽請酌辦王仁和所部從緩亦可周雲仙定於數日內起程赴蘭必可整理一切也餉事只能節節敷衍 批回允先提四百萬加入兩江蘇州各省關任是如何亦斷不能坐視不理此次 廷旨及部議均極嚴切我處催索不可太迫只要南疆事機順利當不惹置進兵南疆則糧運兩事均可從容樽節亦當不少開捐之議以待來年何如昨接張朗齋信云托克遜經毅齋於三月十三日同時克復孫提督金彪已赴托克遜見總統朗齋亦擬前去似毅齋已將達坂城克復然後分兵會克吐魯番并下托克遜也如此則南八城



可次第拾取戎機得免阻滯惟毅齋至今尙無捷報到來雖由古城迂道遞送不及吐魯番徑捷然亦不至如此遲遲殊不可解旬餘以來辦理吐魯番採糧善後諸事委員出關金運昌募補各營出關馮桂增馬隊收回關內撤遣一切頭緒紛繁需用亦多此後或又可稍息也

上總理各國事務衙門

前奉鈞函并承照錄給俄使照會謹已領悉俄商石河被劫一案鈞意應由外議結遵卽密飭各局員查詢被劫俄商見在題及前事與否以憑酌辦比據覆稱無復理舊說似被劫商人近并未到境內宗棠竊以舊日失事商人既難蹤迹又未便張揚其事致啟

書牘卷十八

完

浮冒之弊是在外議結無從著手竊以俄商接濟逆回只圖獲利徐學功帶團剿匪所奪者濟賊之贓俄雖指名索賠徐學功儘可直認不諱從前尙以俟獲賊黨追究爲詞見則瑪納斯南城既克妥逆黨夥已盡無從追究布使亦以易於了結爲言似以早結爲是外間旣無從尋覓失主賠款交付何人可否仍照前請劃扣徐學功應得屯墾經費銀萬兩文布使給主完案之處伏候鈞裁如布使尙不以爲然或心存計較必欲如願相償則我固有詞矣至陸路通商與海口本自不同船運與車馱曳負勞費懸絕立議之初自宜彼此商榷期於商情允愜稅權無虧乃能久遠相安免煩胥舌俄人國於北方其東北西北均與我緊連惟中段爲蒙部遮

閩恰克圖地小而非總要路口其注意西陲互市固無怪其然然俄之物產無多其精好者非中國日用所必需其粗重者由車馱運售腳價過貨本數倍十數倍銷路難暢商情見利則趨斷不甘心折閱觀泰西諸國來商於中土者倒歇日多可知大概此猶舟楫之國也若城郭之國游牧之國而計及懋遷其利鈍之數不可懸揣乎宗棠竊謂俄商互市其來貨不過哈喇氈毯哈薩布等物中國可有可無邊方貧苦荒儉久已樸陋相安此等非所必需行銷必不能廣惟內地所產茶葉大黃絲棉紅花爲彼所需茶除湖廣所產向有引商行銷陝甘新疆外四川所產行銷本省有鹽茶道主之陝西產茶之地僅石泉漢陰一帶近因湖茶不行皆侵銷

書牘卷十八

三

甘商引地俄人見湖廣川陝之茶皆必由甘肅經過始達於邊而大黃爲甘肅各郡縣所產川中絲棉亦必由甘肅經過始達於邊則嘉峪居其總要其注意互市而添入嘉峪口者以此察看情形彼以互市爲利者在銷中國之貨於中國無損而有益甘肅得釐稅之入爲創獲於瘠區不無小補我以互市爲利者不能多銷外國之貨其銀多入於中國也至於口埠之多寡仍以銷貨之衰旺爲斷市旺則口埠增市衰則口埠減見在我不必定其子口彼利盛則增利微則減亦自然之勢卽如漢口洋行始爲泰西各國所共爭今且因生計蕭條多經閉歇求售無主又旗昌洋行推與華商是其明驗蓋洋貨惟鴉片一種流毒久而英專其利所獲最多

此外則所售非中國日用所必需始則有利可圖終則價貴滯銷  
成本與子息暗多虧耗而奸商乃成拙商矣俄議互市其本謀在  
茶葉大黃絲棉以甘肅爲來源相距較近所省運腳爲多而實又  
其國日用所需并可由其國水路銷行西海各部落爲利厚而可  
久耳論者謂俄之計利太深究將貽中國之患不知茶葉大黃絲  
棉之屬在中國地大物博所產取之不窮行銷既廣可以土物易  
金銀於百姓生計無損而有益中國土物不能自銷外國俄以之  
出售於絕域不鄰之區縱取贏十倍亦由其能力所致於華商并  
無所妨況由川湖採運至甘本華商生計乎所慮索價太高俄商  
無利可圖將又顧而之他不奪不饜或至另生枝節則定議之初

與其悉心妥議務期兩便亦未嘗無策也至俄與中國疆域毗連  
與泰西各國情形不同俄又方事兼併異時刮糠及米防其洩食  
誠不可不預爲之所從前索思諾福斯齊等言及通商諸事宗棠  
亦曾與之議論及此申明俄商內地貿易須由中國蓋造行棧由  
俄商出備租息不得任意擴充侵佔官民地址又互市原係兩國  
久遠之計旣敦睦誼應泯猜嫌互市定議總在逆賊殄除之後俄  
商往來中土不得夾帶槍礮不須護衛俄兵免起風謠致生變故  
索使等亦似謂然因恩遠告歸未及深論擬將來本此立言力持  
租地起造行棧俄兵不准藉防護爲詞雜居內地之說或可免啟  
戎心此外有關係緊要之處必當審慎圖之然非面與計議則無

由斟酌而歸於一是故謂非詳細商議呈之總署轉達宸聰不

能定局而其國亦非奏派相當大員主持此議以朝命行之不

可也緣索使在俄係八品官約是三四等官職嗣來接見之烏史漫達迷

勞伏則僅係四品約是七八等官職品卑望淺未足擔荷遠謨烏史漫達

去後未來古城索使自去年夏初到信後亦無音耗所來說話者

僅只見金和甫及古城局員雖間有稱官人者然皆俄商耳一次

持科布多文案路票帶貨由古城到巴里坤一次由古城巴里坤

到哈密均爲銷貨計比經巴里坤鎮張提督告以奉總督令官軍

正在剿賊互市之議尙未定局應俟逆匪剿除兩國互市通商已

有定局再當遵照辦理該商等旋即退回聞所帶氍毹外玩藝居

書牘卷十八

三

多亦本非軍民所需也布使所稱商貨被官所拘制者卽此瑪納

斯南城克後和甫始有與俄人康密斯克訂買俄糧之事每石三百

數十斤計只需銀六兩由西湖運至昌吉均由康密斯克包承不外

給腳價聞此糧卽係伊犁所出康密斯克攬賣金軍者頃接俄官

來文因俄商解糧被劫指稱榮將軍部下所爲見正咨和甫查明

秉公辦理此糧旣是官所訂買與石河濟匪正是相反不可援徐

學功爲比已切致和甫矣俄文呈覽互市早應定議只因索思諾福斯

齊等久不見來亦無信到無與交談俄商又不足與言是以延閣

至今迄無成說茲布使旣以各事奉詢可否卽於石河劫案議結

時并將收回伊犁奏派得力大員會議互市事宜一併敘及之處

伏候鈞裁愚見俄英正爭印度治兵相攻猝難了結索思諾福原  
議互市之人久不見到自是兵事羈身且人微言輕慮非俄商所  
服如仍係俄商信致布使虛詞相商恐難得其要領不若俄國請  
派大員前來會議之爲慎重也見值進兵南路機局尙順之時各  
軍一抵阿克蘇則繞出伊犁之尾俄前言收回後再失俄以兵克  
之便與中國不相干涉或不復出諸其口矣一應如何辦理之處  
伏候酌度示復庶有遵循

與劉毅齋

得托克遜捷報幸慰何如月餘以來總以未得達坂捷報爲疑而  
羅觀察三月初七日辰刻達坂所寄營務處譚心可函又盛言賊

書牘卷十八

三

守之堅未言可望得手與否鄙懷不能釋然嵩武孫提督徐提督  
所報三月十三日會克吐魯番情形詳於十一日以前而略於吐  
魯番會克蓋不知是日雄旆并復托克遜也羅孟威又未將攻克  
達坂情形敘入見告謂齋時尙在途僅據孫徐之報轉稟亦未及  
尊處達坂戰事故弟三月廿九日拜摺所陳均尙切實惟孫徐所  
報斃賊數目但渾渾言之而於羅譚先到一層未能料及然孟威  
亦云少頃兩軍齊到是不能并其會克而抹之也馬人得卽安集  
延所立甘回頭目見官軍到卽投亦不僅在孟威一處此等事均  
無足深尤惟徐提督必欲向其索取洋財又如肅州找馬四說話  
一般糊塗似此殊可惱恨渠性厭聞正論早擬棄置不用故所部

滅汰僅贖五營又以其曾帶多次重傷未便罷斥此次奪徐萬福所部兩營畀之亦非佳選本不放心但據事體而論吐魯番本是一名城安夷白逆久已盤踞雄師攻破達坂是三月初七日安酋等得信縱早縱快亦在初九初十兩日孫徐等初五日進兵克復各城卡其時賊未擬棄吐魯番也初五日兩軍節節進攻各行數百里而後十二日始能抵吐境近處十三日始能會復空城是孟威一日夜即到之程途皆兩軍轉戰數日行走兩倍有餘之程途也功無可言勞亦足錄至行軍不外勦撫所欲得而甘心者安夷白逆及其死黨耳於土回自無波及之理弟於上年擬進南路時屢以此意曉示諸軍尊處及嵩武外蜀軍亦嘗諄諄及之此次孟威

書牘卷十八

十四

及朗齋所部孫提督均能體會獨崑山有縱兵擾掠情事見已委雷振之前往辦撫綏善後等事實則兼察蜀軍耳大軍西進崑山所部姑畱吐魯番將來可陸續撤回朗齋心性明敏日有進詣意欲立功西域不甘畱後當令并進耳南路本產糧又多車輛打開一處辦一處糧辦一處運自足敷衍一切可與朗齋商之採糧已委龍潘兩令攜銀二萬兩而去其時以麾下苦攻達坂糧運艱阻擬由吐買糧以供茲接托克遜捷報及金將軍所錄達坂捷報又擬俟借到餉銀解到再源源解濟大約各軍在吐境停頓不久若吐境屯糧太多又難轉運不如節節採辦爲宜但須每處有一兩月儲存則放心矣白逆之不就撫而必就安酋早在意中能令帕

夏縛獻自可省事特恐未必做到手此卽頌捷安惟甯靜致遠四字相屬餘無他言

答李伯質主政

摺弁攜到二月廿七日惠函具領所示餘杭案了已見邸鈔中外議論互異卽浙人亦有難於盡同者石泉中丞宦情素淡前數年寄其書聯有知公神僊中人勉爲蒼生畱十稔憶昔湖山佳處曾陪黃菊作重陽蓋石泉以重九生去浙時曾於靈隱爲作生日也不意十稔句竟成語讖曾沅浦二月底啟行計不久當已履新矣丁中丞到臺後大有調發江浙亦預作準備未知辦理何如示弱之後恐難言自強耳英西林都護聞已至蘭計端陽前後可以過

書牘卷十八

五

肅二月初雪銷路出劉張徐三道進兵連克各城隘吐魯番達坂城托克遜數日內一齊到手機局尙順惟懸軍深入無可恃巨餉時爲寒心會榜已放未知得第何人想豪傑必翩翩而起也

答朱茗生理卿

旗昌洋行歸與中國人言棄舊換新不爲無因然洋行倒歇之多實亦由生意淡薄洋貨滯銷之故弟前在福建卽有所聞大約除鴉片外無可求贏者而雇倩薪奉日用飲食之費所需不貲出入相權虛耗不少恐數年後洋行如旗昌者將層見疊出耳餘杭案如此了結浙中議論互有不同服毒無傷骨之說將來刑部及外省定讞無所遵從壯男少婦雜處嬉笑其婦改嫁之姑及其親夫

皆有所聞見恐教經甚於畫眉乃直決其無姦又果何所見何所聞乎楊中丞胡侍郎皆一時端人陳邊兩守及鄭令皆弟在浙時屬吏謂其傳會成一冤獄亦似必無其事無確據而故入重罪罪固難辭無確據而故出重罪且昭雪莫須有之姦而以不知避嫌坐之其又何說乎天下事故多矣略其大者爭其小者何也石泉與時局不合此次削職歸里不過當初秋試報罷景況何敢怨尤而此種風氣一開外間事涉刑名益難措手其讀書不讀律者更復茫然矣

答劉毅齋

連接托克遜所發捷報及各函比卽草疏具陳由六百里馳遞想

書牘卷十八

美

天顏有喜 賞賚攸隆凡關心大局者莫不慶幸同深也此次得機得勢尤在達坂擒斬無遺足令狂賊喪膽惜得報遲遲未克先達 宸聰殊深悵惜十五日行查各地方營汛之檄甫發而尊處兩捷報亦至遂濡筆草奏敘次精整足彰偉伐私懷亦曷以局勢論安酋事急以白逆爲贄事在意中大通哈此時曾否得帕夏回報想已分曉所慮白逆狡黠非帕夏父子所能制或至別生他變然亦無能爲耳從來西域辦賊渠魁多漏蓋西北荒遠種人雜居易於逃匿不若東南一海繚繞界畫可稽也然安集延東距官軍西爲俄人所逼持此安歸白逆坳安酋以存安旣失勢白將焉往此賊勢所可逆料者尊意擬暫作小停頓於事勢不得不然且吐



魯番採糧巴里坤運糧亦非可速辦之事以時日計仍是緩進急戰擔遲不擔錯一說耳巴局所存大米一百七十餘萬本預備大軍進規南路之用黃米亦多較之麥稞連設者最有實濟已飭王詩白儘力運解吐魯番已飭雷道帶隨員前往設局糧銀先後起解六萬兩斷不至缺乏四五六數月餘糧栖畝軍食易於取濟明齋治事之才人不易及閣下但傾懷相與必有可成夾帳棚藍白千計有零候再飭哈局續解鐵掀雖是定做尺寸斤重與尋常倍加然價值腳費合算甚不便益此後師行愈遠不能照辦須從本地設法吐魯番本是產棉出布之區平價購買自易耳南八城富饒著名物產甚多一切免從內地取辦節省勞費不少幸畱意焉軍需概照民價購取卽是功德若增給腳價斷非所宜幕中人未集自應從寬收錄厚給薪水惟時局如此餉之難得迥異尋常仍宜加意撙節保舉犒賞均從中制爲是南八城次第可望得手凡在事出力諸人何患不能如意此時先爲之極後此何以加焉曹武惠使相遲授宋祖待其平江南而後酬之當時君臣之際不嫌坦懷相示如此我輩開列功次只好賞從其薄待南八城悉數收復再思有以處之未爲遲也凡百詳慎出之前書甯靜致遠四字幸時畱意千萬千萬

與許筠庵學使

甘屬佳卷無多尙蒙獎借具徵大君子循循善誘盛心武威或當

稍勝想搜校之餘定多佳想惟溽暑按臨葆衛匪易尙希以時珍攝爲禱諸軍進規南路捷狀頻聞吐魯番克復之時毅齋總統先有達坂之捷繼於是日克復托克遜并分軍會克吐魯番因其捷報係由烏垣阜康繞遞而來迂迴千餘里故遲遲始到今日始能草疏詳陳數城齊下賊膽益寒大局可望速了惟懸軍萬里餉源中斷殊用焦煩耳

與張朗齋

馬撥於四月初一日設齊馳遞甚速此次四月十七日發遞之件廿八日卽到肅州又較前此更速籌策精詳卽此可見佩服佩服大概情形已奉 批回本月二十五日又將會克詳細情形入告

書牘卷十八

美

并請獎勵摺稿遲日卽可奉達也雷觀察此時計已行過安西續發糧銀四萬合前共六萬委員續派八員均已咨達冰案巴里坤之糧尙數百萬斤哈密安西存糧更多官車騾早已派去見正加雇民車由哈運吐但不知瞭墩一帶車騾是否通行尙希留意另函馬隊節料之法已通行各軍矣

答劉克庵

餉事不繼至廬蓋抱弟已於廿五日拜發達坂托克遜會克吐魯番詳細情形捷報附陳懇 恩敕撥部款二百萬未審能否仰邀慈允四月以前各省關協餉不滿三十萬似尙不如前此踴躍此請實萬不得已弟自恩迹行間從未敢以此瀆請上年爲金和甫

奏請四十萬亦只奉 允廿萬此次所乞更踰十倍恐難冀如數

其實樞部如肯設法籌維則照上年辦法部撥二百萬仍在兩洋

取償亦資通融也陝西借款三十萬到亦僅敷五月而止事勢甚

迫惟毅齋處今年已解過實銀四十萬三起募勇已發過實銀五

六萬

吐魯番買糧又去見銀六萬兩

又見到黃道龔提督帶回遣勇及各將弁寄

回安家銀共需十五萬九千六百兩由肅蘭陝鄂各臺局分給是

五月內不解餉亦儘可敷衍見擬哈吐改設臺站馬撥將來古城

一局無須多解查巴里坤哈密安西存糧尙千餘萬斤只愁無運

故飭巴里坤將存糧由七克騰木運吐魯番哈密由瞭臺運吐魯

番而以官民車馱濟之昨接到尊處所解二十萬兩擬暫點綴各

書牘卷十八

无

營局之用是陝借三十萬可毋庸急解肅州也向陝省富商巨室

息借備用一著吉田并無信來文卿之純若有可圖必合盡力當

飛函商懇惟弟有不慊於秦人者自我徂西曾無一人一士助展

一籌於天理人情似均不合官場陋規至今仍少改革官吏視總

督儼若贅旒弟亦不望其邪許相助也茲閣下既遣尊農前往且

看光景何如恐未必慨然耳久不見雪巖信弟亦無信去詢探雪

巖前致若農書有事多夾雜之說弟初不知何所指聞聞撫丁公

亦有借二百萬之議大約所謂夾雜者此耳丁公上年力阻弟借

極言借洋款之害今乃躬自蹈之亦可笑近時巨公均急洋防

置邊防於不顧大率類此接總署信知郭少司馬已由英國都具

奏請禁鴉片據稱此議卽英人所發當是不虛此事弟早有所聞英人知鴉片流毒中國將來必有報復欲藉此先爲釋怨之計無如時局必欲示弱銷兵且以鴉片入口爲釐稅大宗姑以此爲止渴之醜也內地嚴禁罌粟先謀治內乃必應舉行之事甘省全境實已漸就減少如牧令均能一氣孚心奉行不怠自可日減一日俟其將盡而加嚴限重法迫之則禁斷非難內地整理但禁外洋鴉片更易爲力矣達坂托克遜之克毅齋勞烈已高分營會復吐魯番何足計較原摺所敘但據張徐函牘其時并未接得羅孟威稟報卽以三軍同時會攻吐魯番具奏昨次覆陳詳細情形尙覺平實想細意熨貼而無鍼綫之迹高明當能一覽知之耳進兵喀

書牘卷十八

早

喇沙爾產糧無多仍須由巴哈兩城轉饋而前恐未能速毅齋辦法不能因糧於敵動擬數月存儲未免過於持重且勞費愈甚苦無可籌已與商之如需弟親履前行當卽投袂而起耳再周雲仙四月十三日由此啟程計已到省肅得龍部由其從容裁併計可就緒外郭工葺金城屹立快慰何言滕世耀歸櫬二百金不足惜惟滕春山已解餉赴古城其族姪是否可恃無從詢悉近世人心被一利字蝕盡實難放心惟長途扶櫬兩百金當無侵吞之事耳陝北防軍本足敷分布譚鎮旣已簡補實缺當可與劉福堂齊名邠隴遺防九旂自應陸續撤遣黃彝峰應調出山如願來西邊

則弟可調其仍統蜀軍也

徐崑山應撤

答譚文卿

餉事直不可問遇有萌孽必遭折損殆天絕之提前四百萬雖蒙  
恩允而各省關早已泄沓視之且遠水不救近火懸師絕域無巨  
款接濟軍心願待問耶承飭軍需局挪湊三十萬兩暫資接濟敬  
仰公忠厚誼感荷何言然五月以後又將停軍懸釜不得已而有  
部款二百萬之請未知能邀 兪允否竊計樞邸戶部縱能鑒及  
苦衷不復固拒然由順天解至陝西已需時日而此間然眉之急  
已迫不及待矣爲當奈何克庵書來言秦中富室巨賈甚多出息  
告貸必有應者希飭之純吉田諸公爲我圖之不勝盼切之至三  
月初七日達坂之捷十三日托克遜之捷同日會克吐魯番城戰

書牘卷十八

望

事實爲順利如得巨餉速到自可放手辦事惜善舞苦無長袖何  
也再蘭亭得 簡補實缺必能遵福堂舊緒而恢宏之其駐紮邠  
隴各營自可陸續裁撤併爲數旂俾得分布北山各處其彝峰所  
部亦酌量撤畱有四營  
儘足分布邠隴如邠隴可無須分布則以彝峰  
赴吐魯番統其舊部尤爲相宜緣徐提督近與諸軍不協弟擬換  
之也一切均候卓裁示知  
與閩浙總督何小宋制軍

去閩浙已久往蹟難尋然入秦度隴魂夢依依浮屠三宿桑下便  
生愛慕亦恆情也側聞建節是邦且幸且慰數月已來仁風亮節  
計已徧布轄區滄海橫流包荒終吝時局所繫不能無望於二三

賢者遙企旌幢輒深嚮往伏冀宏茲遠謨一慰天下之望西事自暮春之初下兵南路連拔名城要隘機勢頗順惟餉事不能接續無可如何刻深焦灼

與胡雪巖

許久未接良書想因洋款未及定議之故此事一誤於兩江之中梗一誤於許厚如之冒借一誤於閩撫之夾襍而舊緒不可復尋矣弟於春融進兵南路甫及陝旬先後將達坂托克遜吐魯番及各名城要隘概行攻拔斬獲極多戎機實爲順利本可乘勝進取以取破竹之勢適協款遲遲不到四月以前僅只收二十餘萬前欠各華款固未能清還而前敵餉糧轉運腳價亦無從籌給典思

書牘卷十八

望

及此無任焦灼見經克帥與文卿中丞共商向秦中巨賈富室息借巨款以應急需并附奏懇 敕撥部款二百萬兩能否仰邀恩允尙未可知而此間情形已朝不謀夕矣因思滬上爲華商萃集之所可否仿照洋款辦法向華商息借之處指各省協餉作抵而由陝甘總督陝西巡撫出印票以免仰面求人之煩希卽察酌情形妥速籌辦爲荷西事非一年可了卽了事後亦須見餉接濟緣甘肅無事時本省地丁錢糧不過廿餘萬向例本省特外省協濟不獨此時用兵爲然將來仍須據實詳陳以符舊制計甘肅新疆均照舊制給餉似亦所增無多耳

答周雲仙直刺

溽暑遊征塗中平善深以爲慰今歲雪雨缺少西路盼澤甚殷日  
午驕暘猶飄至不可耐金塔王子莊高臺各處均有蝻蟻孳生寬  
里十數里長已發親兵助捕忙遊殊常恐難撲滅淨盡傳聞關外

戈壁亦有上年敦煌遺孽復生之說

吐魯番上年蝗災所波及也  
昨得湘軍稟吐境今年亦有

此災二麥  
難望也

只盼西風猛雨一解此厄而別後兩次廉纖不成分寸

無可奈何洵堪憂灼達坂捷後賊膽已落本可乘勝長驅而本地  
採糧後路轉饋均非咄嗟可辦之事宜俟新秋乃可著手餉源早  
涸籲求部款實不得已未審 廷議云何洋款迄無音耗各省關  
惟何小宋衛靜瀾尙肯極力籌濟餘則閉目袖手而已托克遜係  
用全力賊已先逃與吐魯番同其得手全在達坂之克無一漏網

書牘卷十八

望

真是奇  
捷全捷

毅齋英鷲殊常惜幕中人於得意之時無以忠言進者弟

頗慮之前月十五日始得其捷報

松樹塘壓擱十二日其時正值  
風大雪擁天山之脊不通人馬

廿五日繕畢拜發劃分兩摺足折服前敵之心卻無一字失實可

一覽而知辰下以巴哈運糧吐魯採運爲要朗齋才智敏贍當能  
料理協宜如餉源能旺足供揮霍弟可安居後路否則仍須投袂  
而起與毅齋爲燕雁之飛自念歷遭艱鉅尙能從容集事不俟迫  
促而能了辦祇盼餉事不至斷絕而南北兩路年穀順成事猶可  
爲克帥體氣尙未復元老年病後調護多方尙難見效若無藥餌  
扶衰更無復元之望可勸其多服薏苡此間所  
出之苡以解角之月證之  
則皆麋茸也價頗不昂醫家謂其能補陰少思慮以資靜攝調理

和平是壽者相弟與克帥皆有嚴急剛褊之患而克帥又每蘊而不宣尤易致疾請時思所以解之營中煙徒恩雜比比皆然甘肅承積疲之後此弊尤甚惟有隨時先以訓誡繼之汰遣或望日漸減少此間時有查出之件而王月亮則尤出意料之外

蔣蕪泉  
老統領差

官大旂中聞尙不少其人可見無管束無稽察之更難耳

與張朗齋

雷道龍令去後又加派八員并解糧銀四萬兩計可以次得達採費想暫資敷衍人才難得發往者亦未必一一稱意只盼謹遵教令無大舛錯久之歷練日深或有一二出色者希不吝訓誨以成其才纏民戶口已查有大概見正清查地畝全境採買三萬石諒

書牘卷十八

署

亦非難加以巴哈灌運軍食似不至缺裹帶亦可有贏惟官民車馱不能專恃後路購雇總須於吐魯番八城隨地辦理一面設法製車買馬編幫承運以節勞費而利師行吐魯番製辦車馱料物極易工匠又多較之內地本爲順便趕車趕馱之人駕輕就熟所需腳價又省自可籌辦將來攻克一城卽如式辦理就地取材事不勞而易理希鼎力助之至荷至荷尊論纏回語言文字難於通曉一切全憑通事而通事多係無賴充當最不可靠卻又斷不可少用之尤須防之此誠扼要之論弟在閩廣卽是如此究資其力未嘗受其弊者蓋祇用以譚譯傳話未以耳目寄之耳西域產馬而無騾負重行遠均以馬短運亦用牛車行正道宜用車輛間道



出奇則用馱馱之用惟騾能多負行速馬所不及駱駝亦適用惟  
歇廠早起廠遲與內地稍別且非所產也將來馱馬不能不兼用  
蜀軍得馬頗多見不准添精騎開馬隊固無所用之擇其壯健者  
架轅作邊套給以時價可也如官民車輛用回馬架轅而以其騾  
勻作邊套亦妙大抵西北邊皆有馬無騾車馱不使騾亦能得力  
耳查明地畝以爲採數準則亦不過就大概言之見在採數宜寬  
籌者以穀齋全軍需用太鉅不能不於日食外兼籌裹帶故欲其  
多以後斷須就地採糧不能專恃長運一定之理吐魯番之糧似  
不必以三萬石爲准可少不蓋糧多運少虛佔正餉多糜局費殊  
非此時所宜謀餉之難  
百倍曩日見在安西哈密巴里坤古城存糧尙在干

書牘卷十八

星

餘萬斤外而轉運均苦腳力不給卽其前鑒也既費重價買糧又  
費重價雇腳何苦爲此修治車路淘井蓋屋多儲柴草開設伙店  
凡此皆以便轉運蓋籌早已及之察看情形均不能不用纏回供  
使令不但此也官軍前進得一處卽須用一處纏回只要照民價  
發採價腳價便可相安減價固不可多給亦不必已與穀齋言  
之矣吐魯番既復商賈爭趨其中有放價收糧以供食用者亦有  
放價收糧囤積居奇者此宜示禁如敢賤收貴糶尤當搜出以充  
軍食自瞭墩至七克騰木南北兩路均通車輛駝隻南路平坦捷  
近尤爲相宜糧料柴草伙店自宜安設惟聞地近風戈壁總須預  
爲籌及以免損失馬撥按站安設極妥極速此後湘軍文報概當

由此遞送薪糧之外宜議酌增賞犒以償其勞如有失誤亦當示  
罰庶分別勸懲而責成亦專矣西路行茶本係陝甘總督專政道  
光初乃爲山西商販無引之茶所奪來示承平時纏回以副茶爲  
大宗其餘千兩茶輒茶均可適用此等皆晉商所販無引私茶也  
弟前兩年已上疏備陳其蠹國之罪爲晉撫及綏遠將軍所格益  
利歸商人而官吏包苴者利其數萬陋規耳來示謂纏回零買每  
斤出銀一兩二錢可謂至貴但不知回稱每一斤合糧稱十六兩  
一斤者輕重若干希查明示知茶務爲籌餉一大宗請詳細訪察  
弟或能畫策以惠華商而綏回部也施均甫志趣甚好可望成一  
人材所需藥味均飭檢寄卽希察收

書牘卷十八

吳

與劉毅齋

雙眼花翎 國制非貝子貝勒不能戴用兩曾克復金陵弟克復  
嘉應髮逆結局均以督撫忝膺 異數和甫以將軍得之則豐鎬  
舊族也閣下雖階止監司而受 恩與督撫無異 朝廷眷注之  
隆爲二百年所未有異時 寵命頻頒非尋常意想所到而在閣  
下則只在意中耳理宜具摺叩謝 天恩如以體制暫宜從緩由  
弟代奏亦無不可幸酌度示知

答胡雪巖

接到先後惠函得悉洋款仍已借定計五百萬七年清款四省協  
餉內分年勻撥力所優爲比卽馳奏并鈔稿奉覽計達台照此次

成借極費心力感荷之至巨款到甘總在秋九此數月內仍盼協餉源源而來庶前敵可免懸釜以待達坂托克遜吐魯番名城要隘一齊到手擒斬極多實西域用兵未有之事安酋帕夏已仰藥自盡逆豎護其尸向西而竄白逆死黨無多不能復與安夷合勢機局甚好惟行師絕域無實餉可指終日繞帳徬徨不知計將安出則亦西域用兵未有之事也部款之請實萬不獲已非不知太府空虛敢以此嘗試特時勢所迫不得不然茲洋款有成則部中又可從容定議矣關外近時天氣有異寒威稍斂暑熱至不可當師人多病尊處所寄丸散希再配寄一分以便分布飛龍奪命丹尤爲合用須多見付爲要餘杭案竟如此了結殊爲不解浙中議論紛歧有云換屍解驗者然乎否耶

書牘卷十八

是

與王若農

得惠書具悉石泉中丞已過鄂渚喜愠不形足知學者襟抱實則吾輩本不利市秀才鐫職放歸不過與秋試觀榜光景相似何所庸心惟換屍一說如果屬實則弊更甚於舞文不解當局者何竟憤憤若此耳

答劉克庵

奏請部款已奉 批回交部速議 廷諭嘉許深至想司農亦必力爲設措惟太府空虛仍盼各疆吏解還部庫安得盡如閩浙江西之公忠許 國肯以大局爲念者乎胡雪巖定借洋款五百萬

極費苦心弟已據以入告并咨總署一力速之計此款到肅總在  
秋冬之交惟此三數月仍是拮据萬狀只得極意撙節東扯西挪  
看能過此饑荒否臺灣無事洋防經費可以少緩無如當局只顧  
目前一已便利不復念及時局何也日間接張軍門羅道及毅齋  
申報帕夏竟以驚懼仰藥而斃夷眾同逆豎西奔白逆踞開都河  
西岸局勢一變本應急起乘之無如餉糧轉運一切不能應手何  
閣下能爲我賜一益智糶否近旬以來兩發喀血舊疾幸尙無多  
今歲酷暑此間當晝煩熱難耐雨澤兩降究未能耐透幸雪泉頗  
盛禾黍尙資蔭注親兵捕金塔王子莊蝗蝻昨甫還營幸不成災  
西林行期當在六月上旬也

答譚文卿中丞

書牘卷十八

吳

時論以西事耗費至多意欲中止不知甘肅新疆餉額五百餘萬  
懋恃協濟今縱停軍不進此五百餘萬之餉又豈能少伊犁南八  
城膏腴之地棄而不收但扼烏魯木齊以東寒苦瘠薄之區事何  
可久 高宗昔闢新疆原爲拓邊防省兵餉而起當豐亨裕大時  
尙宜如此況海上多故餉殫力竭之日乎達坂托克遜吐魯番諸  
城旣下逆夷震懼異常逆酋帕夏仰藥而斃逆豎海古拉載其遺  
屍西竄白逆暫踞開都河西已無所恃秋涼前進機有可乘乃爲  
畫地縮守之策何以固邊圉而示強鄰異時追咎貽誤之人老臣  
不能任也擬卽進一文字詳之尊疏已奉 批回希速見示

答張朗齋

五月十六日書到知龍令到哈喇和卓蒙指示一切得有遵循甚爲佩慰東路採收陳糧已得若干未知確數托克遜伊拉里克想採收亦必不少幸詳示之新採雖可三四萬石究竟秋前收穫非多穀齋新秋前進恐未能等候採齊啟行裹帶若干隨後轉運若干一切希與穀齋商之以運事論則古城巴里坤哈密均屬喫緊駝已歇廠惟恃車馱計各處已撥官民車九百餘輛馱騾二千餘而搜索已空見飭由肅造新官車以馬駕轅以騾作邊套并預訂起廠駝隻然非至八月不能應手無法速之吐魯番馬車馱馬前函已懇試辦乞爲畱意三間房至十三間房一帶修路蓋屋濬井刈草設站諸務諸承費心籌辦計此道通行無阻矣雷振之想已到此君樸謹有餘心地亦復明白幸隨事指示尊意戎機宜速此時糧運一切先儘湘軍庶易集事所撥尊處馱騾五幫大車二幫併歸穀齋具仰深顧大局盛心請卽照辦湘軍旣擬交秋前後進兵爲時已迫得此腳力稍紓尊軍繼進當在八月則車馱已可周轉弟當畱意籌辦以資運載也

答曾沅浦宮保

蒙示晉省承餼饉之後庫藏空虛供億繁多支持無術目下情形殆誠有如尊示所云者然晉固雄封耕牧之外利擅商賈苟得人理之酌盈劑虛去其中飽則弊除而利自見猶當勝於無可措手

者去歲旱饑災黎徧野聞春仲已得透雨晚禾尙可補種未卜歲計云何想良材處此必有大異乎人者惟熟察而次第行之以惠閭閻而紓宵旰之急是所至禱關外諸軍連下闕展吐魯番達坂托克遜等城實稱順利安酋帕夏畏威仰藥而死逆豎海古拉載屍西遁庫車聞爲纏回所阻機有可乘惟餉源涸竭轉運不繼不得不停軍以俟秋涼飛輓充足卽當鼓行而西承詢陝甘茶政其廢弛之故由於私販充斥官引滯消而歸化城之私販則由蒙地假道俄邊行銷新疆盡奪甘商引地前咨華潭中丞靜村將軍示禁嗣准咨覆仍是據歸化同知轉據商民一稟藉詞往年成案每歲馱甄茶七千餘箱赴古城藉稱兌換米麪接濟蒙古口食而每百斤僅繳稅銀二錢古城雖設卡緝私彼恃假道俄邊可以擇地而蹈網羅雖張不能遮其片羽也近接張朗齋函知吐魯番每茶一斤拆買之價一兩二錢其名色則甄茶千兩等等卽晉商以湖茶詭混之據晉商成本輕銷售易故獲利獨厚無怪官茶運行口外鈍滯異常弟正擬具摺切實陳之茶有官私與鹽一律東南鹽利取之於民奸商竊取尙思設法禁之西北茶利則輸之外夷奸商竊取而莫之誰何失國家自有利權瘠內地以陪強鄰誠不知其可也其茶務各疏及禁私茶告示已先後咨明貴署有案閱之可得一二摺稿擬就拜發容卽錄送冰案再陝甘以茶馬爲馭邊之策回番之於茶日用必需較之中國於鴉片相近嘉道之交

晉商藉行銷恰克圖爲名採兩湖茶捏稱千兩百兩帽盒桶子種  
種名色欺弄蒙人以牟厚利

其端起於乾隆中

而甘省官商之利日漸少

減咸豐初髮逆擾兩湖茶之運銷益稀晉商無引之茶更由蒙古  
透入俄邊以銷售新疆南北兩路屬回患日熾道路中梗而湖茶  
片引不行晉商之踞俄境者乃獨專其利前年俄使索思諾福斯  
齊等五人來蘭曾於無意中詢及中國人有寓居俄境者否渠答  
云頗多惟山西姓郭者最富問其貲財若干答云可數百萬已與  
俄人結爲婚姻宮室起居與俄同但仍華服耳問其何業答云茶  
商也嗣屬巡捕訪之蘭城晉商僉云果有郭姓其人商於俄而致  
富足徵俄使之說不誣俄使又云伊國飲黑茶者

即見行之茶

約不過

書巔卷十八

五

十五萬人而銷紅茶黃箱者不計其數渠等此來意在紅黃兩種  
耳方今中國財賦已殫東南之取於民者悉矣獨茶利可取於外  
國而又倒授其柄於外捐其利於奸商毋乃不知亦近不仁華潭  
不知其中情實而綏遠將軍歸綏道各文武利其陋規相與朦蔽  
以護其得項弟議遂爲所格擬再言之仍慮扞格不入徒費筆墨  
閣下試畱心察之當恍然於弟說非無徵也茶利雖微不能逮鹽  
利百分之一然貨惡其棄於地也況以捐之奸商資之敵國乎於  
此事能設法籌辦則隴之所得歸隴晉之所得歸晉以中國官物  
還之中國何所區分擬卽據此入告弟亦不僅爲隴計也高明以  
爲何如

上總理各國事務衙門

連奉鈞函謹聆一切英參贊處治哈薩克行劫匪徒一案事雖持正卻未免予以口實若當額魯特兵緝匪時將捉獲一名并作拒捕格斃備案可省多少唇舌至所奏拏獲盜匪無論蒙民外夷卽行處斬實與條約有違尊處上年六月廿二日致英參贊信極爲明允諒已遵行至哈薩克一種雖本分屬中國與俄管轄而商民憚俄征斂之重有時自稱爲中國轄境之人避內地權稅之徵有時自稱爲俄國轄境之人事所常有嗣後遇此等事訊係俄國所屬哈薩克卽行文俄官令其收回如不收回卽按人隨地歸辦理以免案懸不結但須限以時日至遲以三箇月爲度庶彼此有所

書牘卷十八

五

遵守此案布使柏繡譯旣以中國不應將俄國人正法噉噉置辯尊處四月初九日已函致英參贊矣愚意哈薩克人行劫內地額魯特兵槍斃一名布使不以爲非所力持者不應將俄國人正法自係指捉獲之一名而言然哈薩克人行劫內地當緝捕時不辨其爲中國所屬與俄屬之人因其持械拒捕而斃之縛之英參贊訊明行劫屬實拒捕屬實并將其捉獲之人正法是正法者雖俄屬之人卻是中國之強盜以人隨地歸而言在何處游牧卽歸何處管轄則在何處行劫卽歸何處辦理自無別說如布使尙不謂然或責令英參贊償其命價以其國例言之則三十二兩耳似亦可將就了結免滋膠轕但此等事件似應預爲說明備案以省議論布使所稱吐



爾奇斯坦各省總督咨俄商運糧被搶一在石河一在瑪納斯一  
件宗棠前鈔俄官函件函達尊處時一面函致和甫將軍請其切  
實查辦茲得和甫復信已飭駐瑪納斯探屯總局石守定國迅速  
查覆似俄官并無一字咨金將軍殊出意外俟其查覆到日再將  
擬辦情形詳陳尊處定奪近時俄人往來中土者多雖均隨宜照  
料未滋論端而來者多是俄國商人并非官員無從與之計議布  
使函稱俄商不能恃中國保護邊疆大憲輕視其責上年所行各  
劄不靈應如何設法去俄商被害變亂及除本國邊界官憂慮竊  
思兩國和好全在兩國臣僚能仰體主上之意彼此至誠相待  
免起猜嫌至兩國兵民商人則賢愚不一往往各顧其私所言未

書牘卷十八

十一

可偏聽茲查俄人之來中土者遇有事故華員不能理處又無俄  
官爲之理處不得不歸訴於本轄之大員或徑訴於駐京之公使  
而俄員與公使又隔數千里萬里所據者俄商一面之詞故但覺  
中國兵民商人不是疑中國官員之有意徇飾也試思俄之商民  
不可使有虧累屈抑華之商民又豈甘受虧累屈抑俄之商民被  
害變亂宜防邊界各官之憂慮宜除華商與官獨不應防其變亂  
除其憂慮乎如果將章程議定彼此各擇正經明白之員會同商  
辦嗣後遇有事端按章理處迅速了結商民之情通彼此可省多  
少煩心豈不甚好何慮法之不靈也互市通商原有益商民之事  
光緒元年六月俄使索思諾福斯齊等來蘭商及互市宗棠答以

見方用兵未暇及此俟邊境肅清當察酌情形咨商總理衙門詳議具奏見尙未見如何商辦內地商民不知互市緣由而俄商已紛紛帶貨而來請由其銷售其中貲本無多者古城巴里坤哈密印委各員念其往返維艱聞聽其銷售以示體卹而布使前函致尊處已有俄商受其拘束之說是但知責人不知自責而怪邊疆大憲輕視其責俄商不能恃官兵保護果何說也伊犁本我舊疆俄兵代爲戍守原議一俟烏魯木齊瑪納斯克復卽行交還前年索思諾福斯齊等來蘭亦力申前說見在兩城克復已久未聞俄官題及此事自未便向其索取卽邊界大員有以收回伊犁爲言者宗棠等以俄本大國素重信義應聽其自行交還不可由我處

催取有礙體面然近來伊犁纏回販貨來西湖瑪納斯者竟抗不完稅并自稱爲俄國所屬不應交稅釐似有恃以無恐也我兵民商人何能任其藐玩不與計較儻仇怨積深釀成巨案邊疆大員不能鎮壓咎固難辭其若承敦和好之意何布使以如何設法爲問可否以此數事與之熟商預防憂慮之處伏候鈞裁至若石河劫案必當澈底查辦宗棠已切致和甫并擬密派委員前往訪察總期水落石出不致含糊再承示庫倫大臣所言西事今昔不同慮其陽不與我爭而陰助之我之勞費益甚不如先於天山南北安置兵勇招徠農商爲深根固本之計而後與兩大從長定議孰爲兩大屬地孰爲中國版圖當爲區分庶不致與接爲構進退維

谷洵爲老成之見竊維安集延本浩罕四部之一向稱狡悍地與喀什噶爾毗連道光初張格爾之變卽用其部眾爲軍鋒故能抗官軍數年之久近時俄人滅浩罕安集延以地遠倖免自結於英英亦思樹之爲外藩以與俄相持觀上年威妥瑪在總署畱後之言恐安集延爲俄所得可知其隱近日俄英交訌正爭印度土耳其先央英人求和於俄繼而背之爲俄所乘恐其勢不能久英人向以陰謀稱雄西海每與人爭戰先嗾其交鬪而後因其利鈍以用機觀其素與法蘭西狼狽相依及法爲普所敗坐視不援亦不力爲排解可見此次欲護安集延而緩我之攻原因敵俄而起其於安集延何有俄以英不長陸戰久懷輕視之意明知英必護土

書牘卷十八

壹

耳其乃尋衅挑之英雖未顯與俄鬪而其暗中助土以護其腴疆亦處於必然之勢觀此次洋款成借之難畱備兵費亦可見其情實此時欲護安集延有所不暇耳察看俄英方以土耳其爲重而我之勦安集延義在除侵犯之賊以復舊有疆宇俄英固無能難我也日內屢接前敵之報帕夏聞達坂托克遜之報憂泣不已已於四月中仰藥而死其次子海古拉昇其屍西竄行至庫車爲纏回所阻執海古拉殺之并殺安集延兵數十各處纏回所報均同似已確鑿然尙須稍遲乃敢具奏似志大臣所慮爲兩大鵠蚌之說或尙不然只盼有實餉巨數應手當勉竭駑鈍圖之也

上總理各國事務衙門

借定洋款五百萬兩宗棠已於五月二十六日具奏并鈔摺稿及摘錄胡道光墉原稟咨呈尊處請分行知照惟胡道此次商借洋款值外洋多故之時極費唇舌先向怡和繼向匯豐商之至再方有成說而該行固以閩案爲比只允出借仙令每月一分行息查仙令卽爛番銀閩浙粵東沿海諸省皆通行而甘肅則向不使用胡光墉復向普商泰來洋行熟商由該行包認實銀每月加息銀二釐五毫我處只認借實銀還實銀每月一分二釐五毫行息宗棠遂據以入告而其中曲折之多瑣屑之甚固未煩敘也茲據胡道馳稟匯豐行擬定文稿一紙請照行英國公使轉行稅司領事而文內所敘息銀不得過一分各字樣係匯豐諄請必須如此寫

書牘卷十八

美

以便外洋公司辦事順手并請於文內勿增損一字免生枝節云云竊維與洋商交涉本與華商不同曲折旣多疑慮尤甚前定如臨期有誤罰銀十五萬兩旋復加十五萬兩所罰旣三十萬兩之多查閱文稿與原議固無增損蓋匯豐所得息銀本只一分卽懇尊處俯照所擬文稿錄行英國駐京公使轉飭上海英領事知照該行其欽奉准借洋款之上諭亦祈恭錄照會該公使并飛咨各省轉行胡道遵照是所至禱

答張朗齋

接讀惠函并鈔示魯克沁回目邁引探稟知逆豎已經庫車阿克蘇薩牙回人截殺參以毅齋及各處所報賊蹤似已確鑿已入告

矣白逆見踞開都河西此賊不除終非了局此次批回必歸重  
於此亟應詳密籌畫務期罪人斯得仰慰宸懷惟開都河水深  
湏急非船筏莫渡一過西岸則前路無阻該逆兇悍不足狡猾有  
餘恐未能坐待殲擒而庫車阿克蘇薩牙等處纏頭力不足以制  
之非官軍繞道遏其奔衝終難到手或者陝甘各回戀其眷屬輜  
重不肯回竄其中臨時變計亦未可知耳白逆如不西竄則逃匿  
伊犁旁竄羅布淖尋回竄吐魯番與竄海藏之路皆意中事官軍  
似當預爲籌策於進兵之時先布遠勢或就近扼要堵截乃收全  
功吐魯番及喀喇沙爾伏暑燥熱異常蟲蟲最多師期非秋後不  
可然吐魯番產糧刻惟二麥青稞可採高粱必須八月乃可多收

書牘卷十八

七

多採巴里坤哈密灌運儲糧車馱不足又一月一轉愈形遲滯此  
時距立秋止十日耳而兩局所運無多恐秋後尙愁無糧可裹尊  
處與毅齋見在如何籌畫陳探若干新探若干已收若干未收可  
收若干車馱除見有外馬車牛車馱馬可得若干毅齋裹帶若干  
後路輓轆轉運若干弟處無從懸揣希詳示之茶務最爲緊要馭  
邊之策籌餉之源無重於此希極意察訪利弊所在見示吐魯番  
釐局宜設并希詳示又三閒房十三閒房水草不足希仍委委員  
查辦

與劉毅齋

帕夏自臬逆豎負屍西竄又經庫車阿克蘇薩牙等回要殺巨憝

結局應卽據以上陳仰紓 西顧而偉伐奇勳亦光史冊矣白逆  
移踞庫勒奄有逆酋財物軍械暫必不走以此賊平時伎倆言之  
非俟官軍臨近不卽竄動又兼之黨夥眷屬貲財足以係累其心  
假如逆黨中有稍明順逆者知餘燼難以復然爲死裏求生之計  
則縛以自贖亦意計中事特恐狡虜早已防閑諸逆亦得過且過  
而積惡已久爲覆載所不容非盡殺不止其就撫一節終必不成  
耳計其竄路有三向庫車阿克蘇一也旁竄伊犁二也回竄吐魯  
番或徑由羅布淖爾尋竄青海西藏之路三也官軍進至開都河  
東岸必須搭浮橋或奪回賊西岸船隻濟師似宜預爲籌策一面  
進兵分駐要害遇賊紛竄卽起擊之乃收全功想智珠在握達坂

書牘卷十八

栗

奇算可復許也尊意師期當在立秋後惟今歲天氣亢旱燥熱異  
常吐魯番本火州舊地新秋暑氣未退行軍宜俟涼定乃爲合宜  
巴哈兩局灌運儲糧爲數非多難供裹帶及後路輓轡轉運之用  
兩事實爲難處見函致朗齋將一切情形詳爲示知師期遲速仍  
須由尊處酌定弟不能遙制也部款一百萬分兩次起解司農亦  
迫於不得已耳洋款借定五百萬先解一半然均須秋間及冬初  
始可望到見所恃以支持者息借商民之款耳再大軍西進除白  
逆一起尙煩兵力此外各城自無再抗顏行者惟喀什噶爾則叛  
弁叛兵心懷疑懼或不免奮臂當車或紛竄異域爲偷息一時計  
雖勦撫兼施自操勝算然亦重煩擘畫矣至安集延布魯特等種

人儘可度外置之或歸俄或歸英我可不管用兵之意在復舊疆明界畫而已他非所知也

與劉克庵

毅齋心精力果自是無雙近頗有才氣橫溢之慮弟於所請每思裁抑俾竟全功無如左右無人隨事規勸或且愆憑以遂其過其稟請開缺回籍尤近於挾有勳勞弟頗不取之而報捷兩疏據實入告未嘗有所掩抑聞近亦自悔其孟浪治軍事如常 賞戴雙眼花翎奉 旨後并差弁持弟所戴者致賀計其病已速痊矣陝甘麥收雖歉而秋糧可望豐登肅州得雨數次不成分寸幸泉源甚遠雪水又盛仍不失中稔也承示節流一策至當且便暫宜寅

書牘卷十八

五

諸匄臆且緩施行弟昨拜發兩摺已鈔達冰案意以地不可棄兵不可停爲主疆場之事一彼一此原難拘守成見惟烏魯木齊吐魯番雖已收復可爲駐軍之地而回顧皆荒殘之區復元不易又多饒瘠著名無從籌措北路自精河以西達伊犁南路自庫車以西達喀什噶爾皆精華所萃餉需設措非難若伊犁不能收回庫車以西不能克復或如時議眾建以爲藩籬不能固守終必爲他族所踞彼踞腴疆我守瘠壤恐不能閉關謝客并將舉新復各處而棄之矣覆摺未微及改郡縣設省治之說蓋爲久遠之規不得不爾區區之愚并欲以此爲開源之計通計甘省新疆舊制無事時專恃外省協濟部中撥款藉以支放約略五百萬內外見規畫

全局若能如咸豐以前舊制實餉實解則參以近日新章開源節流并行相輔似將來腹邊地方尙堪自立惜衰朽智慮鈍拙不足副其志願耳至將來籌及節流之策自以減勇爲先固無以易尊論一俟奉到 批回殘局速了當卽舉行近日喀血未發惟神氣總欠清爽時覺煩燥想因暑暘所致秋涼或當健適知承遙注謹以奉聞

上總理各國事務衙門

奉到六月初七日鈞函并問答節略祇悉壹是布使以各案均係違約催我速結無非爲交還伊犁一事作勢榮侯本爲俄國所輕又急於索還伊犁中所忌見雖撤署任而俄商運糧被劫尙未

書牘卷十八

本

據和甫確查覆知英參贊將俄屬入內行劫之哈薩克正法又自貽俄人口實以致議論紛紜致煩辯駁俄使狡謀之逞亦榮英兩君有以啟之大約伊犁不能不交還而遲速難定且要挾需索必不免也奉 諭迅速確查此案哈薩克是否中國所屬私投俄國抑係分歸俄境之人見委李雲麟及劉牧前往查勘緣李於塔爾巴哈臺一帶地方情形尙稱熟悉又通蒙語劉祥匯安詳謹飭堪以隨同查勘也已戒其不可稍涉徇飾亦不必說及辦法只據實告知以憑斟酌核奏行過昌吉時亦稟商和甫將軍便道將俄商運糧被劫一案一併詳加訪察惟道塗遼闊往返八千餘里曠日需時深虞遲滯擬俟其查有端緒卽當斟酌奉聞也吐魯番全境



本火州舊地入夏炎熱異常今歲又值亢旱土客皆穴地以居見在探運糧料一俟涼風暫至便當鼓行而西安集延逆酋帕夏父子既已結局僅白逆偷息開都河西此賊悍鷲不足而狡詐有餘計其竄路有三一西竄庫車阿克蘇一帶一迤西而北竄伊犁境內一取道羅布淖爾回竄吐魯番亦可覓荒僻無人之徑東竄敦煌以取通海藏之路已密致劉錦棠張曜於進兵時就近攔截遏賊奔衝免分兵力惟迤西而北竄伏伊犁邊境一著雖爲過慮然鋌而走險急何能擇亦所宜防如白逆竄入伊犁官軍自當躡蹤追擊可否於俄使處先爲題及如彼時伊犁尙未交還勿誤疑官軍追賊爲徑取伊犁也至柏繡譯所稱英派欽差淑姓到西安集延之說此間并無所聞官軍以收復舊疆爲義并無利其土地之心安集延存亡置之度外可耳其卒爲俄有爲英有抑其遺種尙能自存非所知也又云安集延有人至本國說其不要給中國運糧此語亦殊不確俄糧於上年五月既已議停俄商陸續運到古城者再三求售照給原價勉允所請即便欣然嗣又與金和甫訂探千萬斤彼方有所利而爲此安集延不能阻俄官亦不能勸之禁之也

與劉毅齋

烏垣本貴軍後路應畱臺於此然古城有糧無運以之供金提督一軍尙未卜何如自不能再供貴軍尊意後路臺務移設吐魯番

托克遜自是正辦其烏垣卽交金景亭可也惟達坂托克遜是由烏垣進南路要隘應分駐營頭是否以達坂併歸金景亭分營照料抑須由尊處撥營鎮壓來牘未及分晰言之希卽飛咨告知以憑照辦英都統久於皖中軍務景亭一軍皆其舊部當能指揮如意昨接總理衙門來函言及英國已派欽差淑姓到安集延是否實有其事未卜何如然喀什噶爾是我舊有疆宇安集延不能強行佔據卽帕夏猶活亦不能由其佔據何況畏罪自盡我之兵力應卽躡蹤追剿盡復舊疆豈容他人饒舌如果英官淑姓已到安集延或前來說話尊處可以此意告知屬其自行酌度一面備文告知弟處聽候回信喀什噶爾係叛弁何姓原帶換防兵丁及安集延兵丁竊踞官兵壓境仍是勦撫兼施其安集延兵丁如收回原地不敢抗拒官軍亦可免剿至我換防兵丁及叛弁何姓與各叛弁等雖准反正自贖饒其一死但須遣歸內地不准畱於彼處致貽後患似此處置英人亦可無辭若必以無情無理之詞來營混瀆尊處儘可置之不理或令其自到肅州講論亦可總要以禮相待外面照常周旋料英人亦無可藉口耳

